

## Saksframlegg

---

**Saksnr:** 2020/36937-8  
**Saksbehandlar:** Lasse Kolbjørn Anke  
Hansen

---

## Saksgang

Utval	Utv.saksnr.	Møtedato
Vestlandsrådet		25.06.2020

---

## Løysingsforslag "Database for økonomiske nøkkeltal på Vestlandet"

Forslag til vedtak

1. Vestlandsrådet sluttar seg til løysingsforslaget for ein database med økonomiske nøkkeltal for alle verksemdar på Vestlandet med moglegheit for geografiske og næringsmessige aggregering.
2. Vestlandsrådet ber Vestland fylkeskommune invitere dei andre fylkeskommunane til eit samarbeid om eventuell etablering og drift av ein slik database, der intern ressursbruk og fordeling av kostnader vert nærare avklart.

Rune Haugsdal  
fylkesrådmann

*Saksframlegget er godkjent elektronisk og har difor inga handskriven underskrift*

## Saksutgreiing

### Bakgrunn for saka

Offentleg tilgjengeleg statistikk om næringslivet er i liten grad tilpassa regionale, kommunale og lokale behov. Fylkeskommunar, kommunar, næringsklynger, media og befolkinga generelt har berre tilgang til det SSB har løyve til å offentliggjere, og dette vil ofte vere data som er for grovmaske, anten i nærings- eller geografisk inndeling, til at det gir nyttig informasjon. For det kommunale og regionale verkemiddelapparatet gjer dette at ein i liten grad kan halde oversikt over og følgje utviklinga i enkeltnæringar eller spesifikke geografiske område.

Vestlandsrådet har derfor sidan 2008 fått produsert økonomiske nøkkeltal for utvalde næringar på Vestlandet. Gjennom dette har fylka, og gjennom informasjonsdeling også andre regionale og kommunale aktørar, fått tilgang til verdifull styringsinformasjon om næringslivet på detaljert nivå. Arbeidet har hatt eit klyngeperspektiv heller enn eit streng nærings- eller bransjeperspektiv, og har på den måten søkt å avdekke verdikjeda i klyngene.

Leveransen har i siste kontraktsperiode kosta om lag kr 200 000,- per leveranse. Under den noverande avtalen var siste leveranse av data våren 2019, med opsjon om tilsvarande leveranse i 2020 som ikkje er utløyst.

Fylkesrådmannen legg med dette fram sak med forslag til korleis fylkeskommunane på Vestlandet i eigenregi kan etablere ein database med nøkkeltal for utvalde næringar i landsdelen.

### Tidlegare vedtak i Vestlandsrådet

I sak PS 22/2019 (sjå vedlegg) heiter det;

*«Fylkesrådmannen meiner tida no er moden for at fylka sjølve tek over arbeidet med å framskaffe, kvalitetssikre og formidle detaljerte næringsdata, ikkje berre for utvalde næringar, men for heile næringslivet. Fylka har den naudsynte kompetansen til å gjere denne jobben sjølv og dette vil bidra til større eigarskap og auka bruk. Etter innleiande etableringskostnadar vil dei årlege vedlikehaldskostnadane truleg verte lågare enn ved å nytte eit konsulentselskap. Gjennom å gjere dette sjølv vil vi også kunne få eit produkt som femnar heile næringslivet på Vestlandet, og som kan gjerast opent tilgjengeleg for publikum, til nytte både for fylka, resten av det regionale verkemiddelapparatet, kommunane, næringslivet, media, akademia og samfunnet elles.»*

Målsetnaden for prosjektet er ein kvalitetssikra database med økonomiske nøkkeltal for alle verksemder på Vestlandet som kartlegg alle delar av næringslivet i fylket og følgjer utviklinga over tid. Samanliknbare tal for resten av landet vil også bli produsert.

Databasen skal bidra til kunnskapsbasert næringsutvikling på både kommunalt og regionalt nivå og vere ein portal for næringsklyngene, media, akademia og andre som søker oppdatert, kvalitetssikra informasjon om næringslivet på Vestlandet.

I sak PS 22/2019 vedtok Vestlandsrådet at;

*«Vestlandsrådet støttar etableringa av ein kvalitetssikra database med økonomiske nøkkeltal for alle verksemder på Vestlandet med moglegheit for geografiske og næringsmessige aggregering.»*

Vestland fylkeskommune blei bedne om å legge fram eit løysingsforslag for ein slik database på første møte i rådet våren 2020. Prosjektgruppa har saman med konsulentane i Bouvet gjort ei omfattande kartlegging av potensielle datakjelder og tekniske løysingar for ein slik database.

### Datagrunnlag

Grunnlaget for databasen er regnskapsdata om alle rekneskapspliktige verksemder på Vestlandet frå Brønnøysundregisteret via Proff Forvalt. Desse er tilgjengelege tilbake til 2008. Desse vert kopla mot Einingsregistreret for å fordele økonomisk aktivitet frå hovudeining til undereiningar, for på denne måten å kontrollere for den såkalla hovudkontorproblematikken.

Basert på lønstatistikk og eksportstatistikk frå SSB kan vi også estimere tal årsverk og eksport frå kvar verksemd. Data på verksemdnivå vil bli kopla på diverse kjelder for nyttig styringsinformasjon, slik som Register for offentlig støtte (all offentlig støtte over 500 000 EUR), Forskningsrådets søknadsdatabase (alle søknader til Forskningsrådet, både innvilga og ikkje), Innovasjon Norges støtteordningar, og liknande. Løysinga vil byggjast på ein slik måte at det er mogleg å utvide databasen med nye datakjelder i framtida

Sidan databasen er bygd opp frå verksemdnivå kan vi også gruppere verksemder på ulike vis etter behov, for eksempel alle føretak som reknast som en del av den marine næringskjeda med undergrupper som fiskeri, oppdrett, fôrproduksjon, foredling, samt utstys- og tenesteleverandørar. Dette gjer at vi kan seie noko om storleiken og utviklinga i næringar som ikkje følger standard næringsinndeling, som til dømes leverandørindustrien til både marin, maritim og olje- og gasssektoren, reiseliv, media og liknande. Sidan databasen inneheld informasjon om alle rekneskapspliktige verksemder på Vestlandet vil det for første gang også vere mogleg å samanlikne med andre næringar som tidlegare ikkje har vore ein del av nøkkeltalsprosjektet, slik som daglegvarehandelen, bygg og anlegg og tradisjonell industri.

Databasen vil også innehalde samanliknbare tal for resten av landet, men av kapasitetsomsyn kan det vere det må avgrensast til meir overordna næringsnivå.

Tala i databasen vil vere gjenstand for ein del manuell og automatisk feilkontroll, men gitt den store populasjonen av verksemder er det ikkje mogleg å kontrollere alle. Kjente svakheiter ved rekneskapsrapporteringa vil gjere seg gjeldande også i våre tal. Dette er viktig å ha med seg, men det er eit problem som alle som baserer seg på slike tal må handtere.

### Publiseringsløysing

Prosjektgruppa har ikkje nytta mykje tid på å skissere eit mogleg grensesnitt for databasen, då det mest krevjande er å sikre ei kvalitetssikra og robust løysing for datagrunnlaget. Eit godt datagrunnlaget er den primære målsetjinga med dette prosjektet, men eit informativ og oversikteleg grensesnitt er likevel ein av nøklane for å skaffe databasen legitimitet og auke bruken. For å få dette til vil vi støtte oss på den designfaglege og brukarorienterte kompetansen som finnast i fylkeskommunane og hos valte tekniske konsulentstøttemiljø.

Grensesnittet vil i stor grad erstatte papirrapportene som har blitt produsert tidlegare, så den vil som eit minimum presentere tal for Vestlandet som heilskap for utvalde næringar, samt for kvart fylke.

### Kostnadsestimat for vidare drift

#### Allereie løyvd

Utarbeiding av løysingsforslag	Kr 50 000
--------------------------------	-----------

#### Etableringskostnad

Lisens Proff Forvalt	Kr 25 000
Teknisk støtte frå konsulent	Kr 100 000
Prosjektleiing VLFK	Kr 100 000
<b>SUM</b>	<b>Kr 225 000</b>

#### Driftskostnad årleg f.o.m. 2021

Lisens Proff Forvalt	Kr 30 000
Oppdatering og prosjektleiing VLFK	Kr 100 000
Mindre teknisk feilretting og justering frå konsulent	Kr 10 000
<b>SUM</b>	<b>Kr 140 000</b>

### Konklusjon

Databasen vil bli bygd opp med rekneskapsdata for perioden 2008-2018 for alle verksemder på Vestlandet. Dersom det viser seg krevjande å handtere ein så lang tidsperiode vil historiske data kunne bli avgrensa til dei siste fem åra eller einskilde år tidleg i perioden og så full tidsserie t.d. dei siste fem åra. I tillegg vil informasjon om offentlig støtte vere tilgjengeleg for dei åra dette er publisert av støttegjevar.

Databasen skal vere klar for publisering i løpet av tredje kvartal 2020. Første oppdatering vil skje tidleg i fjerde kvartal 2020, då med rekneskapsstal for 2019. Deretter vil rekneskapsstala bli

oppdatert i fjerde kvartal kvart år med tala for året før. Grunnen til at det alltid vil vere om lag eitt års etterslep er at rapporteringa av rekneskapstal skjer på etterskot. På same tid som databasen oppdaterast med nye rekneskapstal vil vi også hente inn oppdaterte tal på offentlig støtte for tilsvarande år.

Aggregerte data på kommunenivå for alle kommunar på Vestlandet vil bli gjort tilgjengeleg i Vestland fylkeskommune sin statistikkbank, og på ønska plattform hos dei andre vestlandsfylka.

Fylkesrådmannen tilrår at Vestlandsrådet sluttar seg til løysingsforslaget for ein database med økonomiske nøkkeltal for alle verksemdar på Vestlandet med moglegheit for geografisk og næringsmessig aggregering.

Fylkesrådmannen ser det som føremålsteneleg at Vestland fylkeskommune invitere dei andre fylkeskommunane til eit samarbeid om eventuell etablering og drift av ein slik database, der intern ressursbruk og fordeling av kostnader vert nærare avklart.